

## Onurà idea innovativa ad Ardez

■ (anr/afi) Immez il cumün d'Ardez as rechatta la Butia da besch. 13 duonnas elavuran qua la lana da la bescha d'Ardez a chapütschas, stinvs, cuvertas, plümas ed oters prodots pel minchadi. Inizianta e presidenta da la Società Butia da besch es *Claudia Janett* d'Ardez. Avant divers ons ha'la gnü l'idea d'elavurar la materia prima da lur bescha e da vender ils prodots finals. La gronda part da la lana vain

elavurada da las duonnas cun lavur manuala. Uschè promovuan ellas las cugnuschentschas per quista lavur e pisseran per üna contribuziun activa per mantgnair eir in avegnir quist'abilità. In mardi saira han Janett e seis team pudü tour in consegn il Premi d'innovaziun 2016 da la Regiun Engiadina Bassa Val Müstair.

> PAGINA 9

## ENGIADINA

MESEMNA, ILS 12 DA AVRIGL 2017

9

# Prodots da lana sun in moda

Premi d'innovaziun per la Butia da besch ad Ardez

DAD ANNATINA FILLI / ANR

■ La Butia da besch ad Ardez ha survgni il Premi d'innovaziun 2016 da la Regiun Engiadina Bassa Val Müstair. Üna part da la lana da la bescha dal cumün vain elavurada in quista butia a stinvs, chapütschas, cuvertas ed ad oters prodots dal minchadi. L'allevamaint da bescha ha in Engiadina Bassa üna lunga tradiziun. Ad Ardez abitan daplü beschs co persunas: 400 abitants possedan intuot 600 beschs. Intant cha la charn d'agnè es da quist temp retscharchada nun es la dumonda per prodots da lana uschè gronda. L'intent da la Butia da besch ad Ardez es d'elavurar la materia prima da la bescha indigena a prodots da qualità, e quai per grond e pitschen.

### Mantgnair las cugnuschentschas

Chapütschas, stinvs, figüras da fieuter, cuvertas, plümas, pels da besch e lana in diversas culuors as chatta illa Butia da besch ad Ardez. In ün chantun, davu il taler, sezza *Annina Tönnet* e fa culs spaits. Il taler svesa es, sco ch'ella manzuna, be durant singuls dis da l'eivna in funcziun. In tuot sun 13 duonnas da la regiun ingaschadas in ün o l'oter möd a favur da la Butia da besch. E minchüna dad ellas ha si'incumbenza. Fieutrar, tesser, far cul spait, cusir e far servezzan da butia tocan pro lur lavuors quotidianas. Inizianta da quist proget e presidenta da la Società Butia da besch es *Claudia Janett* d'Ardez. «Nossa lana vain in ün prüm pass lavada ed elavurada in üna fillandaria da lana i'l Partens. Landroura faina lura ils prodots finals cha nus vendain in nossa butia», disch ella. La gronda part da la lavur culla lana da besch vain fatta



Annina Tönnet (schn.) e Claudia Janett in lur Butia da besch ad Ardez.

FOTO A. FILLI

a man ed uschè mantegnan ellas quistas cugnuschentschas da l'elavuraziun da la lana da besch eir per l'avegnir.

### Elavurar la materia prima

Immez Ardez, ingio cha las vias sü da Scuol e nan da Ftan as cruschen, as rechatta la butia culs prodots da lana da besch. La butia es adüna occupada cun üna da las 13 duonnas. «Tant ils giasts sco eir ils indigens chi vegnan pro nus in butia pon eir verer co cha'ls singuls prodots vegnan fats», manzuna Janett. Daspö la stà da l'on 2009, cur chi's vaiva drivi la butia, vain elavurada üna part da la lana

d'Ardez in cumün. «La bescha vain tusa duos voutas l'on e quai dà mincha vouta üna gronda quantità da lana.» Plü bod gniva surdatta quista lana a la Centrala svizra da lana o cha la lana gniva büttada davent. «Eu d'eira adüna da l'avis chi füss da far alch plü radschunaivel cun quista materia prima.» L'antieriura butia «Mengiardi» d'eira daspö ons abandonada e Janett vaiva l'impreschiun cha quista localitè füss il lö ideal per vender prodots da lana. Hoz vain ella sustgnüda da duonnas in tuot las etats e dals differents manters. «La gronda part da nus ha svesa a chasa bescha. E per tuottas dess esser la

lavur per la società ün guadogn superplü», declera Janett.

### Sviluppar prodots novs e mantegner vegls

Las duonnas da la Butia da besch ad Ardez sviluppan adüna darcheu novs prodots. «In collavuraziun cun üna designra da textilas vaina sviluppà nossa giacca da lana. Quist prodot vain fat cun lana da nossa bescha e la floudra es da lana da merino», disch Janett, e: «Pel mumaint es quai nos hit chi vain cumprà fich svent.» Per ella esa important da restar actualas culs prodots e da fuormar adüna

darcheu alch novv. Quai vain lura fat in collavuraziun cun perits d'utrò. Cün ir dals ons es dvantada la Butia da besch ad Ardez eir ün lö d'inscunter tant pels giasts sco eir pels indigens. «S'inclegia cha nus profitain eir cha'ls prodots da lana sun darcheu gnüts in moda. Impustüt las chapütschas fattas a man sun pel mumaint fich retscharchadas.» Uschè daja eir darcheu blera glieud chi fa svesa quists prodots e chi'd es in tschercha da lana in da tuot las culuors, sco quella chi vain spüerta illa butia immez Ardez. «La gronda part da noss cliaints sun giasts e proprietaris da seguondas abitaziuns chi vegnan fingià daspö ons qua pro nus.»

## Premi per ideas innovativas

La Conferenza da presidents da la Regiun Engiadina Bassa Val Müstair ha surdat in mardi saira il Premi d'innovaziun 2016 a la Butia da besch ad Ardez. Cün realisar l'idea da quista butia han pisserà *Claudia Janett* e seis team per ün spüerta attractiva. Plünavant s'haja procurà per üna spüerta innovativa e mantgnü plazzas da lavur illa regiun. L'intent dal Premi d'innovaziun es d'onurar interpraisas e portaders da prestaziuns innovativas chi pisseran per üna spüerta o prodots particulars, chi promovuan l'economia e chi pisseran per üna creaziun da valur per l'Engiadina Bassa e la Val Müstair. Plünavant as voula promover cun quist premi potenzials regiunals in resguardond ils principis economics ed ecologics.